

SCRIPT OF MORNING GOJRI NEWS BULLETIN 24APRIL 2025 1015HRS

مارننگ گو جری نیو ز بلیٹن مو رخہ 24 اپریل 2025

یوہ آکا شوانی جموں ہے عبدالرحمان تین خبر سُنو۔

INDIA MEASURES

بھارت نے پہلگام دہشت گرد حملہ تین بعد کئی سخت اقدامات چایا ہیں۔ جن مانہ سندھیہ آبی معاہدہ ۶۹۱۰ غی معطلی تے اٹاری ور مربوط چیک پوسٹ نانہ فوری طور ور بند کرنو شامل ہے سلامتی بارے قابینہ کمیٹی نے کل شام وزیر اعظم نریندر مودی غی رہائش گاہ ور منعقدہ میٹنگ مانہ مجموعی حفاظتی صورتحال غو جائزو لیو تے تمام افواج نانہ ہائی الرت رہن غی ہدایت دتی۔ نویں دلی مانہ زرائع ابلاغ نانہ دستاں واں خارجہ سکرٹری ویکرم مسری نے اس بارے مطلع کیو خارجہ سکرٹری نے دسیو جے نویں دلی مانہ پاکستانی ہائی کمیشن مانہ موجود دفاعی فوجی بحریہ تے فضائی مشنیراں نانہ ناپسندیدہ شخصیت قرار دے دتو گئیو ہے انہاں نانہ ایک ہفتہ غے اندر بھارت چھوڑن غی ہدایت کی گئی ہیں اسی طرح بھارت اسلامآباد مانہ اپنا ہائی کمیشن تین دفاعی بحریہ فضائی مشنیراں نانہ واپس بلا رہیو ہے خارجہ سکرٹری ویکرم مسری نے کہیو جے ان عہداں نانہ متعلقہ ہائی کمشنر مانہ منسوخ کردتو گئیو ہے خارجہ سکرٹری نے کہیو جینیپہلی مئی توڑی مزید کمی غی زیرعے ہائی کمشنر غی مجموعی تعداد ۵۵ تین کہٹ ہو غے ۰۳ رہ جے غی۔

CABINET MEETING

جموں کشمیر غا وزراء غی کونسل نے کل ایک اہم میٹنگ منعقد کی جس کی سورت وزیر اعلیٰ عمر عبداللہ نے کی یاہ میٹنگ پہلگام غا باشنداں علاقہ مانہ ہون آلا دہشت گردانہ حملہ غے بعد بلائی گئی وزراء غی کونسل نے معصوم جاناں گا ضیائع تے عام شہریاں ور اس بربریت تے بُزدلانہ حملہ غا نتیجہ مانہ ہون آلا زخمیاں ور گہرو ڈکھ تے غم و غصہ گو اظہار کیو۔ تے اس بلا مقصد تے سفاک دہشت گردی غی سخت مزمت کی گئی میٹنگ مانہ ۲ منٹ غی خاموشی اختیار کر غے ان جاناں نانہ خراج عقیدت پیش کیو گئیو۔ وزراء غی کونسل نے نوہ عزم کیو جے وے لیفٹیننٹ گورنر غی انتظامیہ غے سنگ قریبی رابطہ مانہ کم کرے گی تانجے ہر شہری خاص طور ور سیلانیاں تے حساس علاقاں گا رہائشیاں غی جان و مال غو تحفظ یقینی بنایو جاسکے۔

CABINET LG

وزراء غی کونسل نے وزیر اعلیٰ عمر عبداللہ غی قیادت مانہ کل فیصلو کیو جے لیفٹیننٹ گورنر نانہ مسودو دتو جے کہ وے ۸۲ اپریل ۵۲۰۲ نانہ سویرے ساڈھ ۰۱ بجے جموں مانہ جموں کشمیر قانون ساز اسمبلی غو خصوصی اجلاس طلب کریں۔

CM ALL PARTY MEET

وزیر اعلیٰ عمر عبداللہ نے آج پیشی تیں بعد ۳ بجے شیر کشمیر بین العوامی کنونشن مرکز سرینگر مانہ پہلگام دہشت گرد حملہ تیں بعد کل جماعتی میٹنگ طلب کی ہے۔ سماجی زرائع ابلاغ پلیٹ فارم ایکس ور اپنا پیغام مانہ وزیر اعلیٰ عمر عبداللہ نے کہیو ہے جے پہلگام مانہ حملہ تیں بعد انہاں نے آج دوپہر نانہ کل جماعتی میٹنگ طلب کی ہے۔ انہاں نے کہیو ہے جے انہاں نے تمام بڑی سیاسی جماعتاں جموں کشمیر غا تمام معزز ممبران پارلیمنٹ تے جموں کشمیر اسمبلی مانہ حزب اختلاف غا لیڈر نانہ دعوت نامہ پیج دتا ہیں۔

HC MOURN

جموں کشمیر تے لداک غی ہائی کورٹ غی جموں تے سرینگر بینچز نے پہلگام دہشت گردانہ حملہ مانہ قیمتی جاناں گا ضائع ہون ور افسوس غو اظہار کیو عدالت عالیہ ہائی کورٹ غا جموں بینچ نے کل ایک میٹنگ منعقد کی تانجے پہلگام حملہ مانہ جان گوان آلاں واسطے سوگ منایو جاسکے۔ اس میٹنگ غی صدارت چیف جسٹس جسٹس ارون پالی نے کی جس مانہ تمام حاضر ججاں نے شرکت کی تے بطور احترام ۲ منٹ غی خاموشی اختیار کی گئی اسے طرح سرینگر بینچ مانہ وی ایک میٹنگ منعقد کی گئی جس مانہ پہلگام حملہ مانہ جان تیں جان آلا نانہ خراج عقیدت پیش کرن واسطے ۲ منٹ غی خاموشی اختیار کی گئی۔

DISTT HQs MOURN

جموں صوبہ گا بکھ بکھ ضلعان غا سدر دفاتر غا افسران و اہلکاراں نے کل پہلگام دہشت گردانہ حملہ گا متاثرین نانہ خراج عقیدت پیش کیو۔ پہلگام غا دہشت گردانہ حملہ غا متاثرین سنگ یکجہی گو اظہار واسطے سانہ ادھمپور ریاسی رامبن ڈوڈھ راجوری تے پونچھ ضلعان غی ضلعی انتظامیہ گا افسران و اہلکاراں نے ڈپٹی کمشنر غی سربراہی مانہ تعریقی میٹینگاں مانہ ۲ منٹ غی خاموشی اختیار کی۔ متعلقہ ڈپٹی کمشنراں نے جان تیں جان آلا افراد غا لواحقین سنگ دلی تعزیت غو اظہار کیو تے زخمیاں غی جلد صحت یابی واسطے نیک خواہشات غو اظہار کیو۔

WORLD IMMUNIZATION

عالمی ہفتہ برائے حفاظتی ٹیکہ جات ۵۲۰۲ غو آگاز آج تیں دنیا بھر مانہ ہو گیو ہے جو ۰۳ اپریل توڑی جاری رے غو یوہ ہفتو ہر سال اپریل غا وکری ہفتہ مانہ منایو جے تانجے ٹیکان گی زندگی بچانے آلی طاقت نانہ آجاگر کیو جاسکے اس سال گو موضوع ہے ہر انسان واسطے ویکسین ممکن ہے جس غو مقصد یوہ پیغام دینو ہے کہ ہر عمر تے ہر جگہ غا فرد نانہ ویکسین توڑی رسائی حاصل ہونی چاہیے عالمی ادارہ صحت غے مطابق گزشتہ ۰۵ براں مانہ ضروری ویکسینز غی مدد تیں کم از کم ۵۱ کروڑ ۰۴ لکھ جان بچائی جا چکی ہیں۔
